

Inatsisissatut siunnersuummut nassuiaatit

Nalinginnaasumik oqaaseqaatit

1. Aallaqqaasiut:

Aalisarnermut aningaasaliissutitut immikkoortitat pillugit inatsimmi matumani siunertaq tassaavoq inatsimmi aalajangersakkat malillugit sinerissamut qanittumi aalisarnermi nutaanik sanaartornernut kiisalu angallatinik atornikunik pisinermi nutarterinermilu suliniutitut naleqquttunut tapiissuteqartarnissaq. Aammattaaq Aalisarnermut aningaasaliissutitut immikkoortitat pillugit inatsisip siunertarivaa Kalaallit Nunaanni aalisarnermik inuussutissarsiuteqarnermut nutaanik pilersitsisinnaasunik pilersaarutitut nutarterisunut tapiissuteqartarnissaq.

Taamaalilluni aalisarnermut aningaasaliissutitut immikkoortitat pillugit Inatsisartut inatsisissaattut siunnersuut sinerissamut qanittumi aalisarnermut Namminersornerullutik Oqartussat siusinnerusukkut maannakkullu tapersiisarneritut naleqqiullugu suliniut nutaajuvoq.

2. Siunnersuutip immikkoortui pingaarnert:

Siunnersuutip ersersippaa pisuussutit piujuarnissaannut sapinngisamik pitsaanerpaamik teknologi naleqqussarneqarsimasoq atorlugu sinerissamut qanittumi aalisakkatigut pisuussutit suli sunnuteqarluartumik iluaqutiginissaannut atugassamik pilersitseqataanissamik kissaateqarneq.

Siunnersuutip inuussutissarsiutitut tapersiisarneq pillugu inatsisiniit atuuttuniit allaassutaa tassaavoq inatsit naapertorlugu tapiissuteqarnissamut tunngaviummat pilersaarut suliniummil pisiarineqartup pisiarinerani nalingata tamarmiusup minnerpaamik 80 %-ianik aningaasaliisoqarsinnaasimanera. Siunnersuut naapertorlugu 20% angullugu pisortanit tapiissutigineqarsinnaavoq. Pisisut namminneq aningaasaliissuteqarnissaannik piumasaqaateqartoqanngilaq, tassa aningaaseriviit taamaaqataalluunniit aningaasaliissutit annerpaavinik aningaasaliisussat pisisup nammineq aningaasaliissutissaata annertussusissaannik namminneq piumasaqaateqartussaammata. Naalakkersuisulli pisinerup tamarmiusup ilai pigisanut tunngasuusinnaasut nammineq aningaasaliissutit pillugit piumasaqaateqarsinnaanermut periarfissaqarusupput. Tapiissuteqarneq siunnersuut malillugu aatsaat pisinnaassaaq aningaasaliissutit sinneri 80-90%-it aningaaserivinniit pissarsiarineqarpata.

Inuussutissarsiutitut tapersiisarnermut aaqqissuussineq atuuttoq, aalisarnermut, piniarnermut nunalerinermullu tapersiisarneq pillugu Inatsisartut peqqussutaat, tunngaveqarpoq pisiarineqartup nalingata 90 %-ia tikillugu pisortanit

ernialersukkanik aamma ernialersorneqanngitsunik akilersorneqartussaannngitsunillu taarsigassarsisarneq pisisullu nammineq 10 %-ia aningaasaliissutigisussaallugu.

Tit. 1

	Aalisarnermut aningaasaliissutitut immikkoortitat	Inuussutissarsiutitut tapersiisarnermik aaqqissuussineq
Nammineq aningaasaliissutitut imaluunniit namminersortunit taarsigassarsiat	Minnerpaamik 80%	Minnerpaamik 10%
Pisortanit tapiissutitut	20%-i tikillugu	0%
Pisortanit taarsigassarsiat ernialersorneqanngitsut	0%	30%-i tikillugu
Pisortanit taarsigassarsiat ernialersukkat	0%	60%-i tikillugu

Tamatuma saniatigut, siunnersuummi atugassat iluanni, pilersaarutitut nutarterisunut tapiisoqarsinnaavoq, aningaasaliinissamullu periarfissat imatut isikkoqarlutik:

Tit. 2

	Aalisarnermut aningaasaliissutitut immikkoortitat	Inuussutissarsiutitut tapersiisarnermik aaqqissuussineq
Nammineq aningaasaliissutitut imaluunniit namminersortunit taarsigassarsiat	50%	0%
Pisortanit tapiissutitut	50%-i tikillugu	0%

Soorlu qulaaniittunit takuneqarsinnaasoq pisortat aningaasatigut peqataanerat inuussutissarsiutitut tapersiisarnermut aaqqissuusinermit sanilliullugu annikinneerarsuavoq.

Aningaasaliinermut pisortat tapiissutissaat siunnersuutip kapitali 1-ia naapertorlugu Aningaasanut inatsimmi immikkoortinneqartassapput, aningaasallu 2006-imut aamma 2007-imut ukiunut aningaasaliiffiusunut kontomi pingaarnermi 50.06.50, Aalisarnermik ineriartortitsinermit sillimmatini immikkoortinneqarsimallutik.

Naalakkersuisut siunertaraat angallatinik pisinermut tapiissutitut aningaasaliissutitut tamarmiusunut killiliussat 80 %-iisa missaannik annertussuseqassasut. Sinneri 20%-it suliniutitut nutarterisunut immikkoortinneqassapput.

Aalisarnermut aningaasaliissutitut immikkoortitat pillugit Aalisarnermut, Piniarnermut Nunalerinermullu Pisortaqarfik aamma KNAPK-p aamma taamanikkut APK-jusup akornanni aallarniutaasumik oqaloqatigiittarnerni aalisarnermik inuussutissarsiortut pisortat assigalugit aaqqissuussinermut aningaasaleeqataasinnaanerat oqallisigineqarnikuuvoq. Taamaalilluni tunisinermi tunisat nalingisa siulliit 0,5%-iinik akiliisarnissaq KNAPK-p akuersaarnikuuaa. Tamatumani killiliussassat pillugit isumaqatigiittoqarsinnaasimanngilaq, taamaattumik Inatsimmi Kapitali 1-imi periarfissiisoqarpoq kingusinnerusukkut tamanna pillugu malittarisassiortoqarsinnaasoq.

Periarfissaavoq kingusinnerusukkut inatsisiliornikkut Aalisarnermut aningaasaliissutitut immikkoortitanut inuussutissarsiortut tapeeqataasarnissaat aalajangersarneqarsinnaavoq. Taamatut tapiisarneq tunisat aallaqqaammut nalinginik aallaaveqarsinnaavoq imaluunniit pisuussutitut ernialiinissamut inuiaqatigiit aalisarnermiit kissaataannut tunngatillugu pingaarnerusutigit eqqarsaatigineqartoq tunngavigineqarsinnaalluni.

Aalisarnermik inuussutissarsiortut namminneq akiliutigisinnaasaat immikkut inatsimmi aalajangersarneqarsinnaapput, takuuk inatsisini tunngaviusuni § 43.

Inatsimmi aalajangersakkat naapertorlugit tapiisoqarsinnaananut nammerisamik aamma/imaluunniit allamiit aningaasaliisoqarnissaanut piumasaqaatit saniatigit pingaaruteqarpoq angallammik pisineq imaluunniit suliniutip nutarterisup piviusunngortinneqarnera aalisarnerup ineriartorteqqinnissaanut tapersiissasut.

Taamaattumik siunnersuummi pilersaarummik naammattumik allaaserinnittoqarnissaanik piumasaqaateqartoqarpoq. Tapiissutit aalisarnermut aalajangersimasuinnarnut killilerneqanngillat. Aalisarneq, siunissami qaninnermi aalisagaqassutsikkut aningaasarsiornikkullu tunngavigisanut naleqqiullugu aaqqissuusaanikkut naleqqussarnissamut annertunerpaamik pisariaqartitsisoq maannakkut tassaavoq qaleralinniarnaq.

Tapiissutit utertillugit akilerneqarnissaat piumasarineqarsinnaavoq arlaatigullu pisoqartillugu utertillugit akilerneqartussaallutik. Pigisanik nalilinnik siunnersuut malillugu tapiissutit atorlugit aningaasalersorneqarsimasunik ukiunik qulinik piffissaliussap iluani tuniseqqinnermi siulliulluni tapiiffigineqartumut tapiissutit piginnittup nutaap tigusinissaa akueralugu Naalakkersuisut nalunaaruteqarsinnaapput.

Siunnersuut malillugu tapersiineq tapiissuteqarnikkut pissaaq, tapiissutilli tunniunneqarpata avataaniit aningaasaliisoqarnissaanik neriorsuummik pissarsisimanissaq aammalu pilersaarutip imminut akilersinnaanissaanik ilimagisaqarneq piumasarineqarluni. Aammattaaq pilersaarut naammassineqarsinnaasariaqarpoq, tamatumani ilaatigut piumasarineqarluni oqartussanit akuersissutit tassunga attuumassuteqartut piffissaliunneqarsinnaasup iluani pigereerneqarnissaat imaluunniit pissarsiarineqarnissaat naatsorsuutigineqassasoq.

Tapiissutit utertillugit akilerneqassanngillat §§ 12-13 naapertorlugit ingerlasoqarsimannqip-pat. Piumasaqaatigineqarporli pigisaq nalilik aamma/imaluunniit ingerlataq tapiiffigineqarsimasoq tapiisoqareernerata kingorna ukiut siulliit qulit ingerlaneranni Naalakkersuisunit akuersisoqqaartinnagu tunineqassanngitsoq.

Taamatut tunisinnginnissamut piumasaqarnej toqqarneqarpoq tapiissutit aningaasannanniutigineqarnissaat pinngitsoortinniarlugu. Naalakkersuisut naliliinerat naapertorlugu niuernermit aningaasannanniarneq siunertarineqanngitsoq piginnittup nutaap pigisat nalillit aamma/ imaluunniit suliniut nalinginnaasumik tigusinnaassavaa, tapiissutit utertinneqarnissaannik piumasaqaatitaqanngitsumik.

Pilersaarutip aningaasaqarnerata misissornissaanut aamma pilersaarummut aningaasartuutit pilersaarutillu kingunerisaanik isertitat uppersarnerisigut tapiissutisinnissamut piumasaqaatit naammassineqarsimanersut misissornissaannut Naalakkersuisut periarfissaqarusussimapput.

Aningaasanik pissarsinnissamut tunngavigisat qaangiinnarneqartillugit tapiissutit utertillugit akileqquneqarsinnaapput, siunnersuummilu § 12-imi taaneqartunik pisoqartillugu tapiissutit utertinneqartussaallutik.

Tapiissutit utertillugit akilersinneqartussanngorneri ilaatigut tassaapput eqqunngitsunik pingaarutilinnik paasissutissiisimappat, inatsit naapertorlugu piumasaqaatinik qinnuteqartoq malinnissimanngippat, imaluunniit tapiissutisisoq ingerlatseqatigiiffimmik aqutsinnissamik piukkunnateqanngitsoq paasineqaraangat.

Tapiissutisissup tungaaniit ingasattumik sumiginnaasoqarsimanera pissutigalugu pilersaarummi akiliisinnajunnaartoqartillugu tapiissutit utertillugit akilerneqarnissaat piumasarineqarsinnaapput. Tamatuma saniatigut pilersaarutip tunineqarnerani imaluunniit piginnittuni allannguisoqartillugu tapiissutit utertillugit akilerneqarnissaat piumasarineqarsinnaapput kiisalu oqartussanit akuersissutit pisariaqartut pigineqarunnaaraangata.

Tapiissutisinnissamut piumasaqaatit sumiginneqartillugit pillaaummik akiliisitsisoqarnissaanut Inatsit periarfissiivoq. Naalakkersuisunut salloqittaalluni paasissutissiineq suliniummilu uppersaatinik nassiussinnginneq aamma pillaaummik akiliisitsinermik kinguneqarsinnaapput.

Naalakkersuisut pinnaatinneqarput annertunerusumik malittarisassiornissamut suliniutit suut tapiiffineqarsinnaanerini aamma nunap immikkoortui suut siuarsarniarneqassanersut. Aammattaaq Naalakkersuisut malittarisassanik aalajangersaasannaapput inuussutissarsiutit immikkoortui suut siuarsarniarneqassanersut, aammalu qinnuteqartunut suliniutinullu ilinniagaqarnikkut, aningaasaqarnikkut teknikkikkullu suut piumasarineqarsinnaanersut.

3. Pisortanut aningaasaqarnikkut allaffissornikkullu kingunissai:

Nalilerneqarpoq Aalisarnermut, Piniarnermut Nunalerinermullu Pisortaarfimmu

anigaasaqarnikkut allaffissornikkullu kingunissai ulluinnarni aqutsinermut annikitsuinnaassasut. Malittarisassat aqukkuminartuupput uppersaanissamullu piumasaqaatit pilersaarummillu allaaserinninnissat sukaterneqarsimallutik taamaalilluni qinnuteqaatinik assigiinngitsunik naliliineq piviusorsiorluni ajornanngitsumik naammassineqarsinnaalluni. Naliliineq taamaalilluni tassaavoq anigaasaliissutigineqartutut killiliussat iluanni siunnersuut aqunneqarsinnaasoq. Suliniummik allaaserinninnissamik piumasaqaatit annertusisat allaffissornermut annertuumik nanertuutaanissaat ilimagineqanngilaq. Inuinnarnit avataaniittut imaluunniit anigaasaliisartut allat avataaniittut anigaasaliinerat tunngavigalugu tapiissuteqartoqartassaaq. Inuussutissarsiutigalugu anigaasanik atukkiisartut suliniutinik allaaserinninnissamik allaaserisat isikkulersornissaannik ajornartorsiuteqarnaviannngillat. Taamaattumik piviusumik qinnuteqartunut suliniummik allaaserinninnissaannut allaffeqarfiup ilitsersuinissaa pisariaqassanngilaq.

4. Inuussutissarsiortunut anigaasaqarnikkut allaffissornikkullu kingunissai:

Inatsisissatut siunnersuutip kingunerissavaa inuutissarsiummut nutarterinerup ingerlanneqarnissaa ajornannginnerulissasoq taarsigassarsisarfiit namminersortut kisimik anigaasaliinissaanut sanilliullugu. Suliniutit nutarterisut suliniutillu ajutoorfiusinnaanerusut ajornannginnerusumik anigaasaliiffigineqarsinnaalissapput, naliliisoqarporlu tamatuma siunissami aalisarnikkut pilersaarutini anigaasaqarneq siuarsarlugulu pitsaanerulersissagaa.

Inatsisissatut siunnersuut tapiissutisinissamut periarfissaqartitsinerulissaaq, siusinnerusumullu naleqqiullugu tapiissutisarnermut piumasaqaatit suliamut attuumassuteqarnerulissapput anigaasanik taarsigassarsisitsisartut avataaneersut taarsigassarsiat minnerpaamik 80 %-inik anigaasalersuisalernerisigut. Inuussutissarsiutinut tapersiisarnermik aaqqissuussinermut maannakkut atuuttumut sanilliullugu siunnersuummi sukaterisoqarpoq, siunnersuummi nalinginnaasumik namminersortuniit anigaasaliisoqarnissaanik piumasaqaateqarneq pissutigalugu.

Ilimamagineqarpoq qinnuteqartoq anigaasaliisaartut suleqatigalugit qinnuteqaammik suliaqassasoq. Taamaattumik naliliisoqarpoq inatsisissatut siunnersuutip inuussutissarsiortut annertunerungaartumik allaffissortilernaviannngikkai.

5. Avatangiisitigut pinngortitamullu tunngasutigut kingunissat:

Angallatinik nutaanik taarsersuineq avatangiisinut annikitsumik sunniuteqassaaq, tassa angallatit nutaat avatangiisit pillugit malittarisassat nutaat malillugit sananeqaateqartussaammata.

6. Innuttaasunut allaffissornikkut kingunissat:

Tapersiissutinik pissarsiniarnermi sukumiisumik pilersaarutip allaaserineqarnissaa pisariaqarpoq.

Taamaattorli naliliisoqarpoq namminersortunit anigaasaateqarfinniit, taarsigassarsinermi il. il. nalinginnaasumik piumasarineqartartut sinnerlugit tamanna piumasaqaatitaqanngitsaq.

7. Naalagaaffeqatigiinnermut namminersulernissamullu tunngasut:
Siunnersuut Naalagaaffeqatigiinnermut namminersornermullu kinguneqartussaangilaq.

8. Oqartussanik kattuffinnillu tusarniaaneq:

Aalisarnermut Aningaasaliissutitut Immikkoortitat pillugit Inatsisartut inatsisissaattut siunnersuut ukununnga tusarniaassutigineqarpoq: Kalaallit Nunaanni Aalisartut Piniartullu Kattuffiat (KNAPK), Kalaallit Nunaanni Kommuneqarfiit Kattuffiat (KANUKOKA), Kalaallit Nunaanni Sulisitsisut Peqatigiiffiat (GA), Nunaqavissut Sulisitsisut Kattuffiat (NUSUKA), Sulinermik Inuussutissarsiuteqartut Kattuffiat (SIK), Sparbank Vest A/S, GrønlandsBANKEN A/S, Aningaasaqarnermut Pisortaqaarfik, Inuussutissarsiordermut Pisortaqaarfik, Akileraarternermut Pisortaqaarfik aamma Avatangiisinut Pinngortitamullu Pisortaqaarfik.

Tusarniaanermi akissutit tamanit tiguneqarput, kisiannili uuminnga tigusisoqanngilaq: Nunaqavissut Sulisitsisut Kattuffiat (NUSUKA). Tusarniaanermi akissutitut pisortaqaarfiup oqaaseqaatai uingusunngorlugit allaqqapput.

Isornartorsiutit siunnersuutillu pingaernerit ataani ilanngunneqarput. Itinerusumik apequtit aamma inatsisissamut siunnersuutip qanoq paasineqarnissaanik apequtit ilanngunneqanngillat.

KNAPK-p kissaatiginngilaa suliniutinut nutaaliortunut aalisakkanik tukertitsiviit ilanngunneqassasat, tassa silaanaq nillerpallaartut nalilerneqarmat: *Nunani allani Kalaallit Nunaattut allorniusaniittuni aningaasat isertitarineqartartorpasuit tunngavigalugit siunnersuut taanna malinneqanngilaq. Inuussutissarsiortut ajutooriaannaallutik aningaasaliissuteqarusuppata, aalisakkanik tukertitsiviliornissamik periarfissat Naalakkersuisut ammatikkusuppaat. Suliniutinut qinnuteqaatini taamaattuni silap pissusai suliniutinilu piviusunngortinneqarsinnaasut nalilersuinerni soorunami ilaatinneqassapput.*

Nammineq aningaasaliissutissaq 10%-iusoq KNAPK-p qaffasippallaartut isigaa 5%-ilu siunnersuutigalugu. *Inatsisissamut siunnersuutip allanngortiternerani nammineq aningaasaliinissaq piunasaqaataajunnaarpoq. Aningaaseriviit taamaaqataalluunniit nammineq aningaasaliissutissat annertussusissaat aalajangissavaat.*

KNAPK isumaqarpoq tuniseqqinnermi piunasaqaat ukiuni qulini atuuttusaaq ukiunut arfineq pingasunut allanngortinneqassasoq, Naalakkersuisut akuersissuteqarnissaat pisariaqassanani. *Isumagineqavippoq, Naalakkersuisut akuersissuteqassasut aaqqissuussinerup aningaasannaniutigineqarnissaa pinngitsoorniarlugu. Tamanna taamaallaat pisinnaavoq tunisinerup piviusunngortinnginnerani Naalakkersuisut akuersissuteqarpata. Taamaammat aalajangersagaq allanngortinneqanngilaq.*

KANUKOKA-mit tusarniaanermi akissut allanngortitsinermik kinguneqanngilaq.

GA-p isornartorsiorpaa inuussutissarsiortut tapiissutaat pillugit GA-p aamma Pisortaqarfiup isumaqatigiissutaat imminnut ataqagiinnginnerat. Siunnersuummi § 1 maannakkut siunertanut paragraffiuvoq aalisarnermiillu inuussutissarsiortut akileeqataasinnaanerat kingusinnerusukkut aalajangersaaffigineqarsinnaanerit pillugu allaaserisaq nassuiaatinut nuunneqarluni. Tamatumunnga pissutaavoq taamatut periarfissaqarnermut aalajangersagaq ersersitsiniaannartussaammat. Aamma tamanna nassuiaatini pitsaanerusumik sammineqarsinnaammat.

SIK isumaqarpoq siunnersuummi § 11 malillugu uppersarsaasoqarnissaanik piunarsaqarnissamut periarfissat erseqqarluppallaartut. Piunarsaqaataasariaqarpoq uppersarsaatip taaneqartup nassiunneqarnissaa. *Sunut tamanut uppersarsaateqarnissaq allaffissornermut nanertuutaasussaassaqaq, aamma "tamanut atuuttumik nalunaaruteqarnermi immersugassaq" suliarineqaraluarpuunniit. Aammattaaq immikkut ittunik pisimasoqartinnagu tapiissutit pineqartut utertillugit akilerneqartussaannngillat. Taamaammat aatsaat Naalakkersuisut pisariaqartitsippata uppersarsaanissamik piunarsaqarsinnaaneq periarfissaassaqaq.*

Sparbank Vest A/S-p tusarniaanermi akissutaa allannngortitsinermik kinguneqanngilaq.

GrønlandsBANKEN A/S-ip annertunerusumik nammineq aningaasaliissuteqarnissaa kissaatigigaluarpaa. *Aalajangersakkami § 5 imaalillugu allannngortinneqarpoq aningaasaliinermi namminersortuni taarsigassarsiat namminerluunniit aningaasaliissutit minnerpaamik 80 %-iunerannik Naalakkersuisut maannakkut takusaqartassasut. Aningaaseriviit allallu avataaniit aningaasaliisuusut taamaalillutik qinnuteqartunut nammineq piunarsaqataatitik aalajangersorsinnaalerpaat.*

Aningaasaqarnermut Pisortaqarfiup suliniutinut qinnuteqaatit isikkulersorneqarnerat eqqarsaatigalugu allaffissornermi aningaasatigut kingunissai oqaasiinnartigut apeqqutigai. *Oqaaseqaatini nassuarneqarpoq suliniutinut qinnuteqaateqarnermi isikkulersuineq immaqa qinnuteqartup taarsigassarsivia suleqatigalugu pissasoq, taamaammallu suliniummot qinnuteqaatip isikkulersornera pillugu qinnuteqartup ilitsersornissaanut sulisunik annertuumik pisaqariaqartitsisoqarnissaa ilimagineqanngilaq.*

Inuussutissarsiortnermut Pisortaqarfik aperivoq tamakkiisumik ilaannakortumilluunniit taarsigassarsinermut taarsiullugu suliniutinut nutaaliortunut nammineq aningaasaliisinnaaneq sooq periarfissaanngitsoq, siunnersuutigalugulu "Nammineq aningaasaliissutit" aamma "Namminersortunit taarsigassarsiat" ataatsimoortinneqassasut.

Inatsisissatut siunnersuummi § 8 allannngortinneqarpoq, taamaalilluni massakkut allaqqalerluni avataanit pilersaarutigineqartumi aningaasartuutit qanoq annertutigisut tapiiffigineqarnerisut. Pilersaarummi aningaasartuutit sinnerisa aningaasalersornissaannut aningaasat taarsigassarsinikkut aamma/imaluunniit nammineq aningaasaliinikkut qinnuteqartumit akilerneqassapput. Taamaalilluni

anigaaseriviit imaluunniit taarsigassarsisitsisup taarsigassarsisumut piunasaqaataat nammineq anigaasaliissutit annertussusissaannut aalajangiisuulerput. Taamaalilluni erseqqissarneqarpoq tapiiffigineqarnissamut pingaarnertut piunasaqaataasoq taarsigassarsisoq namminersortunik taarsigassarsisitsisartut imaluunniit nammineq anigaasaliissutit aqqutigalugit 50 %-imik anigaasaliisussarsiorsinnaasoq.

Inuussutissarsiornermut Pisortaqafiup kissaatigaa nukissiuutini sipaarutit inatsimmi ilanngunneqassasut. *Kisiannili nukissiuutini sipaarutit pisariillisaanermut ilaapput, taamaammallu oqaasertalersuineq allanngortinneqarani.*

Siunnersuummi § 6, imm. 2 pisariaqartuunnginnerarlugu Inuussutissarsiornermut Pisortaqarfiup isornartorsiorpaa. *Aalajangersagaq maannakkut peerneqarpoq.*

Inuussutissarsiornermut Pisortaqarfiup oqaatigaa allanut, taassuma ataani assigiinngitsunik aalisarsinnaanermut, tapiissuteqarsinnaaneq periarfissaasariaqarluartoq. *Aalajangersagaq allanngortinneqarpoq imaalillugu raajat "aalisakkallu allat raajaanngitsut" siunnersuummi ilaalerlutik. Assigiinngitsunik aalisarneq siunnersuut malillugu periarfissaasinnaavoq, kisiannili erseqqissumik taaneqarani.*

Akilerartarnermut Pisortaqarfik isumaqarpoq § 1, imm. 3 Tunngaviusumik Inatsisini § 43-mut tunngatillugu ajornartorsiutaasoq. Siunnersuummi § 1 maannakkut siunertanut paragraffiuvoq aalisarnermiillu inuussutissarsiortut akileeqaatasinnaanerat kingusinnerusukkat aalajangersaaffigineqarsinnaanerat pillugu allaaserisaq nassuiaatinut nuunneqarluni. Tamatumunnga pissutaavoq taamatut periarfissaqarnermut aalajangersagaq ersersitsiniaannartussaammat. Aamma tamanna nassuiaatini pitsaanerusumik sammineqarsinnaammat.

Avatangiisinut Pinngortitamullu Pisortaqarfimmiit tusarniaanermi akissut allanngortitsinermik kinguneqanngilaq.

Inatsisissatut siunnersuummi aalajangersakkanut ataasiakkaanut oqaaseqaatit

§ 1-imut.

Imm. 1-mut

Imm. 1-mi siunertaq pillugu aalajangersakkami tunngavigineqarpoq siunissami aalisarnissamut apeqqutaammat aalisarneq piujuartitsinissaq tunngavigalugu siunissamullu isigisumik ingerlanneqarnerisooq. Taamaalilluni aalisarsinnaassuseq pisuussutinik uumassuseqarnikkut piujuartitsineq tunngavigalugu iluaquteqarsinnaanermut naleqqussarneqarsimassaaq. Inatsisip siunertaani siunissamut isigisumik paasineqassaaq pisuussutinik uumassuseqarnikkut piujuartitsineq tunngavigalugu iluaquteqarsinnaaneq, kisianni aamma aalisarnerup

aaqqissuussaanerata aalisarnermi peqataasussat nutaat periarfissaqassasut. Aalajangersakkami aalisarnerup inuiaqatigiit aningaasarsiornerinut sapinngisamik pitsaanerpaamik kinguneqartitsinissaata pingaaruteqarnera erseqqissassavaa, tamannalu naammassisaqarsinnaassusikkut unammillersinnaassutsillu pitsaanerulersinneratigut siuarsarneqarsinnaasoq.

Imm. 2-mut

Aalisarnermut Aningaasaliissutinut Immikkoortitat Inatsisartut Aningaasanut Inatsisaanni immikkoortinneqartassapput. Aningaasat 2006-imi kontomi 50.06.50-imi "Aalisarnermik ineriartortitsinermut sillimmatini" immikkoortinneqarnikuupput.

Aalisarnermut Aningaasaliissutinut Immikkoortitat missingersuisarnermi naatsorsuusiortarnermilu teknikkikkut aaqqissuussineruvoq nunap karsianut ilaasoq. Immikkoortitanut Aningaasanut Inatsimmi aningaasaliissutit, aammalu aningaasaliissutaasinnaasut Inatsisartut Aningaasaqarnermut Ataatsimiititaliaata akuerisai isertitatut nalunaarsorneqassapput. Aalisarnermut Aningaasaliissutinut Immikkoortitat pillugit inatsisartut inatsisissaattut siunnersuut malillugu tapiissutit Aalisarnermut Aningaasaliissutinut Immikkoortitani aningaasartuutitut nalunaarsorneqassapput. Akiliinermi nikingassutaasinnaasut Aalisarnermut Aningaasaliissutinut Immikkoortitani naligiissarneqartassapput. Aalisarnermut Aningaasaliissutinut Immikkoortitat Namminersornerullutik Oqartussani missingersersuisarneq pillugu inatsisartut inatsisaat aamma missingersersuisarnermi malittarisassiaq malillugit atorneqartassapput.

Aalisariutinik taarsersuineq nutarsaanerlu ilimagineqarpoq piffissap ingerlanerani assigiin-ngiiaartumik aningaasanik atuiffiussasoq, tassa sanaartornermut pilersaarutit suliarineqartussaammata, angallatinik inniminniisoqartartussaalluni il.il. Taamaammat pingaarnerunikuun-ngilaq ukiumut aalajangersimasumik akiliisoqartarnissaa, kisiannili aningaasat suliniutit naleqquttut tiguneqarnerat malillugu aningaasat akilerneqartassapput. Aningaasat atorneqanngitsut Aalisarnermut Aningaasaliissutinut Immikkoortitaniinnartassapput.

§ 2-mut.

Imm. 1-mut

Kalaallit Nunaanni aalisariutinik naleqqussaaniissamik kissaateqarnermut tunngaviuvoq sinerissamut qanittumi aalisarneq allanngorartumik imminut akilersinnaassuseqarneranik nassuerutiginninneq. Aaqqissuussaanerme taamatut naleqqussaaneq amerlanertigut annaasaqarnermut atassuteqartarpoq.

Namminerisamik pisariaqartutigut aningaasaliinerup ingerlannissaa ajornakusoorpoq. Aningaasarsiornikkut aalisagaqassutsikkullu imminut napatissinnaasumik aalisarnerup siuarsarnissaa kissaatigineqarpoq, taamaalilluni qaqugukkulluunniit atuuttumik piujuartitsinermik tun-ngavigisani atugassaritinneqartut iluanni aalisarneq imminut akilersinnaasoq ingerlanneqarsinnaaniassammat.

Inatsisartut inatsisaasa siunertaraa ukununga tapiissuteqarnissaq:

- 1) Piffissami sivisuumi aalisarnermik inuussutissarsiorterup ingerlaannarnissaata qulakkeernissaa.
- 2) Aalisarnermik inuussutissarsiortut naammassisaqarsinnaassusiisa pitsanngortinneqarnissaa.
- 3) Aalisarnermik inuussutissarsiortut unammillersinnaassusiisa pitsanngorsarneqarnissaa.
- 4) Aalisarnermi periarfissanut sanilliullugu aalisarsinnaassuseqarnerup ingerlaavartumik naleqqussarnissaanut peqataanissaq.
- 5) Aalisarnermik ingerlataqalersut nutaat aalisarnermi peqataalersinnaanerisa ajornannginnerulersinnissaa.

Ilimagineqarpoq aaqqissuussaannermik nalimmassaaneq ukiuni arlalinni annertusiartortillugu ingerlanneqassasoq, angallatit naammassisaqarsinnaanngitsut imminnullu akilersinnaangitsut angallatinik nutaanik nutaalianillu taarserneqarnissaat taamaalilluni kissaatigineqarluni.

Imm. 2-mut

Inatsimmi siunertat malillugit angallatinut atornikunut nutaanullu sapinngisamik ukiuni amerlanerpaani imminut akilersinnaasumik angusaqarluarlutillu aalisarsinnaasunut tapiissuteqartoqartassaaq. Piffissartinneqartut missingersuutit ukiut quliusut § 10-imi takuneqarsinnaapput.

Piumasaqaataavoq angallatit inuussutissarsiutigineqarsinnaasut akuerineqarsimanissaat imaluunniit Veritas-imiit akuerineqarsimasuunissaat. Angallatit atornikut nunani allani pisarineqarsinnaapput, assersuutigalugu Qallunaat Nunaanni, Islandimi Norgemiluunniit.

Imm. 3-mut

Aalajangersakkami nassuarneqarpoq aalisariutinik nutarterinermi suut ilaatinneqarnersut. Taamaalilluni aalisariummut namminermit kiisalu teknikkikkut atortunut, sillimaniarnermi atortunut, teknikkikkut atortunut allanut, aalisarnermi atortunut atortunullu assigisaannut tapiissuteqartoqarsinnaavoq. Aammattaaq sulioniutip piviusunngortinnissaanut teknikkikkut aningaasaqarnermilu siunnersorneqarnermut pisariaqartunut tapiisoqarsinnaavoq.

§ 3-mut.

Suliniutinut nutarterisunut ilaannakortumik aningaasaliinissamut kissaateqarnermi tungaviuvoq aalisarnernut niuernermit soqutiginaartunut aalisarnermik inuussutissarsiortermit siuarsaasunut piumassuseqalersitsinissaq. Taamaalilluni suliniutit nutarterisut Kalaallit Nunaanni aalisarnermi ineriartornissamut periarfissanik misissuineranut tapersiissapput.

Piareersaatitut sammisat nutaaliorterit tapiiffigineqarsinnaasut pillugit taaguineq tamakkiisuunngilaq.

Nr. 1-imut

Aalajangersakkami pineqarput aalisakkat nutaat, sumiiffiit nutaat aamma aalisariaatsit nutaat. Aalisarnerup maannakkut ingerlanneqartup allanngortinnissaanut aningaasanik isertitsivissatut nutaanik periarfissarsiornissaq aamma ilaavoq.

Nr. 2-mut

Aalajangersakkap siunertaraa aalisarnermi atortunik ineriartortitsinissaq, taamaalilluni taakku assersuutigalugu avatangiisinut qajassuussinerulersinneqarlutik imaluunniit aalisarnermi naammassisaqalersitsinerullutik. Aalisariaatsinik misileraaneq ilinniartitsinerlu aamma ilaatinneqarput.

Nr. 3-mut

§ 3, nr. 2-mi aalajangersakkamut tunngatillugu aalajangersakkami tassani taamaallaat siunertaavoq aalisarnermi atortunik aalisariaatsinillu piujuaannartitsisinnaasunik ineriartortitsineq misileraanerlu.

Nr. 4-mut

Aalajangersakkami pineqarpoq aalisakkat imaluunniit aalisakkat ilaat maannamut niuernerme atorineqarnikuunngitsut tunngavigalugit tunisassianik ineriartortitsinernut tapiissutit.

Nr. 5-imut

Aalajangersakkami pineqarput tukertitsivinnut tunngatillugu misissuinerit ineriartortitsinerillu. Siunertaq tassaavoq aalisarnissamut periarfissanik nutaanik qulaajaanissamut pisariaqartunik misissuinerne aningaalersueqataaneq. Ingerlatsinerme tapiissutinik imaluunniit annertuunik sanaartornerme aningaasartuutitut matussutissanik qinnuteqartoqarsinnaanngilaq.

§ 4-mut.

Pilersaarusiap suliarineqarnissaa saqqummiunneqarnissaalu marloqiusamik isumaqarpoq.

Taamaalilluni, aningaasanik tunniussisoqarnerani, qinnuteqartut akornanni assersuussisoqarsinnaalissaaq, taamaaliernerullu qulakkiissavaa, pilersaarutit assigiimmik nalilerneqarnissaat.

Aammattaaq immikkoortut taaneqartut qinnuteqarnissaaq sioqqullugu qinnuteqartunit isumannaareerineqarsimanissaat kissaatigineqarpoq. Qinnuteqaatit inuussutissarsiutinut tapersiisarnermik aaqquussinerup ataniittut ilisarnaatigisimavaat annikitsuinnarmik immikkoortiterluarlugit suliarineqartarsimani aamma qinnuteqartut pilersaarutiminnik ingerlatitseqqinnginnerminni Pisortaqarfimmiit neriorsuuteqartoqarnissaa kissaatigisarmassuk. Aalajangersakkami siunertarineqarpoq qinnuteqaatit suliarilluagaasimanissaat. Aammattaaq ilinniarsimasunik aamma/imaluunniit misilittagalinnik pilersaarutini

qinnutigineqartuni pikkorissunik aqutsisussanik toqqaasoqartarnissaanik kaammattuinnissaq kissaatigineqarpoq.

Nr. 1-imut

Qinnuteqaammi allassimassaaq sumut tapiissuteqarnissaa qinnuteqaatigineqarnersoq, taassuma ataani aalisarnerup suunera, qinnuteqaammut tunngavilersuut, suliniummi angusassatut suna kissaatigineqarnersoq aammalu suliniummi ingerlatsinermi suna isumassarsiaanersoq.

Nr. 2-mut

Aalajangersakkami kissaatigineqarpoq nassuiarneqassasoq suliniummi aningaasaqarnikkut tunngavigisat suut aallaavigineqarnerisut. Tapiissutissatut qinnuteqaatigineqartut aalajangersimaqqinnaartumut immikkoortinneqarsinnaanngippata suliniummi missingersuummut takussutissaliortoqarnissaa kissaatigineqarpoq, missingersuut, tapiissutissatut qinnuteqaatigineqartut qanoq sumullu atorneqarnissaat kissaatigineqarnersoq piffissarlu qanoq sivisutigisup iluani atorneqassanersut.

Nr. 3-mut

Peqataasut pineqarput taakkuupput kikkulluunniit sulinerikkut, ilisimasamik, aningaasatigut il.il. suliniummut tapersiisut. Kikkut tamarmik suliniummi pigineqataasut, siulliullutik pisisinnaasut imaluunniit pisisinnaatitaasut (pisinissamat salliutinneqarneq) qinnuteqaammi allassimassapput. Uppernarsaataasinnaavoq aktiat pillugit allattuiffik, malittarisassat isumaqatigiissutillu suliniummi pigineqataassuteqarnermik killiliisut.

Nr. 4-mut

Ingerlatsisut imaluunniit inuit pingaarnertit qinnuteqaammi allassimassapput, taakkulu pisinnaasaannik misilittagaannillu aallaaserinnineq ilanngunneqassalluni.

Nr. 5-imut

Suliniutip qaqugukkut piviusunngortinnissaanut piffissaliussamat pilersarusiortoqassaaq. Piffissaliussamat pilersaarut pissutsinik pingaaruteqartunik tamanik imaqaassaaq, soorlu ani-ngaasaliinissaq qaqugu naammassineqassanersoq, isumaqatigiissutit pingaarnertit qaqugu isumaqatigiissuteqassanersut piviusunngortinneqarlutillu, aalisarnerup qaqugu aallartinneqarnissaa ilimagineqarnersoq il.il. Aammattaaq allassimassaaq tunisassiat siulliit qaqugu tunineqarnissaat ilimagineqarnersoq.

Nr. 6-imut

Qinnuteqaammi allassimassaaq atortut, tunisassiornermi atortut, angallatit teknologimilu atortut allat eqqarsaatigalugit suliniut qaqugu piviusunngortinneqassanersoq.

Nr. 7-imut

Qinnuteqaammi isummerfigineqassaaq suliniummi tunisassiarineqartussanik kina pisiortussanersoq siaruarteralunilu. Tunitsivik pineqarpat suliffeqarfiup aqqa

ersissaaq. Tunisassiat pisisartunut amerlanerusunut tuniniarneqarpat pisisartut allaaserineqassapput.

§ 5-imut.

Nr. 1-imut

Suliniutit, akuersissutinik pisariaqartunik, pisassiissutinik, aalisarsinnaanermut akuersissutinik aamma pisortat aalajangiinissaannut pisariaqartunik allanik tunniunneqarnissaannik qulakkeerinnissimasut, tapiiffigineqarsinnaapput. Tassa imaappoq akuersissutit tunniunneqarsimasut imaluunniit neriorsuutigineqarsimappat nangaassuteqarani akuersissutit tunniunneqarsinnaasut.

Nr. 2-mut

Aalajangersagaq malillugu nammineq aningaasaliinissamik piumasaqartoqanngilaq. Aningaasaatit qinnuteqartumit pissarsiarineqartussat taamaalillutik tassaassapput taarsigassarsiat, nammineq aningaasaliissutit imaluunniit taakku akuleriissillugit. Taamaattorli Naalackersuisut § 9 naapertorlugu tapiissuteqarnissamut piumasarisinnaavaat nammineq aningaasaliissutit uppersarneqarsimanissaat.

Ilimagisariaqarpoq aningaasaatit ilai annertuut taarsigassarsinikkut pissarsiarineqartarnissaat. Piviusumik taamaalilluni tapiissutisinissamut tunngavigineqarpoq pilersaarut taarsigassarsiniartarfinit atasinnaasut nalilerneqarsimanera. Taarsigassarsisitsip taarsigassarsinissamut aalajangernerani piumasaqaatinut nammineq aningaasaliissutit pillugit piumasaqaatit ilaatinneqarsinnaapput.

Nr. 3-mut

Qinnuteqaammut ilanngunneqassapput suliffeqarfimmik piginnittuunermut uppersarsaat. Kikkut tamarmik suliniummi piginneqataasut, siulliullutik pisisinnaasut imaluunniit pisisinnaatitaasut (pisinissamut salliutinneqarneq) qinnuteqaammi allassimassapput. Uppersarsaataasinnaavoq aktiat pillugit allattuiffik, malittarisassat isumaqatigiissutillu suliniummi piginneqataassuteqarnermik killiliisut.

Uppersarsaatissanik ilanngunneqartussanik taakkartuineq tamakkiisuunngilaq. Naalackersuisut piumasarisinnaavaat qinnuteqaammut annertunerusunik uppersarsaasoqarnissaa piumasarineqarsinnaasoq. Assersuutigalugu missingersuutit suliamilu pisinnaasat uppersarneqarnissaat Naalackersuisut piumasarisinnaavaat. Aammattaq piumasarineqarsinnaavoq misissorneqassasoq suliniutip pineqartup nunani allani misilittagaqarfigineqarnersoq/misissuiffigineqarsimanersoq, taannalu qinnuteqaammut ilanngunneqassaaq.

Nr. 4-mut

Aalajangersagaq malillugu qinnuteqartup ilisimatitsissutigissavaa, pineqartup siusinnerusukkut Namminersornerullutik Oqartussanit inuussutissarsiornermut tunngasunik taarsigassarsisimanerluni. Aalajangersagaq taanna § 6 nr. 3-mut tunngatillugu isigineqassaaq.

Uppernarsaatissanik ilanngunneqartussanik taakkartuineq tamakkiisuunngilaq. Naalakkersuisut annertunerusunik uppersarsaasoqarnissaa piumasarineqarsinnaavaat. Assersuutigalugu missingersuutit suliamilu pisinnaasat uppersarsarneqarnissaat Naalakkersuisut piumasarisinnaavaat. Aammattaaq piumasarineqarsinnaavoq misissorneqassasoq suliniutip pineqartup nunani allani misilittagaqartoqarnersoq/misissuisoqarsimansoq, taannalu qinnuteqaammut ilanngunneqassaaq.

§ 6-imut.

Inatsit manna malillugu qinnuteqartut tapiissutisinissaminnut inatsisitigut piunasaqaateqarsinnaanngillat. Aalajangersakkami pissutsit qinnuteqaatit nalilersornerini pingaartinneqartut taagorneqarput.

Imm. 1-imut

§ 6, imm. 1-imi erseqqissarneqarpoq immiut akilersinnaassuseq aammalu aningaasatigut piunasaqaatit § 2 malillugu suliniutinut tunniussinissamut pingaaruteqarluinnartut.

Imm. 2-mut

§ 6, imm. 2-mi pineqarpoq § 3 malillugu suliniutini periarfissat suliniut tunngavigalugu suliffeqarfimmik pilersitsivissinnaanerannik naliliineq.

Imm. 1 aamma 2-mut

Aalajangersakkanut marluusunut atuuppoq tamakkiisumik isiginnilluni nalilersuinermi kissaatigineqartoq suliniutini tamakkiisumik allaaserineqarsinnaanngitsunut aningaasaliisinnaanermut periarfissap ammaanneqarnissaa, assersuutigalugu katitigaanerata paasiuminaatsuunera pissutigalugu, imaluunniit naliliisoqartillugu suliniutip piviusunngortinnissaa imatut pingaaruteqartigisoq piunasaqaatinit nalinginnaasunit sakkukinnerusumik piunasaqaateqartoqarsinnaalluni.

Erseqqissarneqassaaq suliniutip aningaasaqarnikkut patajaatsuuneranut uppersarsaat pingaarnerpaaq, §§ 4 aamma 5 naapertorlugit avataani aningaasaliisartunit pissarsinnaanermmut uppersarsaat atorlugu tunniunneqartut isigineqarmat.

Imm. 3-mut

Aalajangersakkami siunertaavoq imm. 1 aamma 2-mi ataatsimut naliliinerit apeqqutaatinnagit qinnuteqartup siusinnerusukkut tapiissutisisimatillugu qinnuteqartunik itigartitsinissamut Naalakkersuisut periarfissinneqarnissaat. Tamatuma qulakkiissavaa tapiissutinik agguaanerup siammarneqarnissaa.

Naalakkersuisut aamma qinnuteqartoq siusinnerusukkut tapiissutisisimasoq, tapiissutisinissamullu piunasaqaatinik sumiginnaasimasoq itigartissinnaavaat. Taamatut periarfissiinnermmut siunertaavoq qinnuteqartut siunnersuutip atulersinnissaa sioqullugu pisortaniit inuussutissarsiutinut taarsigassarsianik sumiginnaasimasunik Naalakkersuisut qinnuteqartunik itigartitsinnaaneratt. Aammattaaq qinnuteqartup

siusinnerusukkut pisortaniit taarsigassarsiaqarsimaneranik Naalakkersuisut takunnissinnaanermik periarfissaqarusupput. Siunnersuummi § 5, nr. 4 naapertorlugu pisortanit inuussutissarsiutinut taarsigassarsisimanermut uppernarsaat qinnuteqartumit ilanngunneqartussaavoq. Aalajangersagaq tamakkiisuunngilaq.

§ 7-imut.

Imm. 1-imut aamma 2-mut nalinginnaasumik tunngasoq

Nr. 1-imi aamma 2-mi immikkoortunut taaneqartunut tapiissuteqartoqarsinnaavoq. Aammattaaq qinnuteqartunut sinerissap qanittuani aalisarnermi, taassuma ataani assigiinngitsunik aalisarnermi, aalisariummik anginerusumik sisammik sanaajusumik pisinissamik kissaateqartunut salliutillugu tapiisoqarsinnaavoq.

Nr. 1-imut

Raajarniarnermi tapiissutit annertussussaasa minnerunerinut pissutaasoq tassaavoq ilimagineqarmat pisassiissutit niuerutigineqarsinnaaneri, taamaalillunilu pisassiissutit qularnaveequtigineqarsinnaaneri tunngavigalugit raajarniutinut avataaniit aningaasaliisoqarsinnaaneranut ajornannginnerunera.

Nr. 2-mut

Aalisarnermut Aningaasaliissutinut Immikkoortitani siunertaavoq kalaallit aalisarnerisa nutarterneqarnissaanut aqqissuussaananermilu pisariillisarneqarnissaanut peqataanissaq. Aalaja-ngersagaq aalisakkanut allanut raajaanngitsunut atuuppoq. Aalajangersagaq maannakkut qaleralinniarnermut tunngasuusaaq, peqassutsikkut aningaasaqarnikkullu piumasagaatit tunngavigalugit piffissami sivikitsumi aqqissuussaananermi nalimmassaanissamik pisariaqartitsinerpaasoq.

Taamaallaat 20 %-i angullugu tapiissuteqarnissamut tunuliaqutaasoq tassaavoq raajanut akerliusumik qaleralinniarnermi aningaasarsiornerup piffissamut killilimmut pisassiissutinik tuniniarneqarsinnaanngitsunik tunngaveqarnera. Maannakkut piffissaq ukioq ataasiuvoq pisassiissutillu qularnaveeqqutitut atorneqarsinnaanatik, taakkumi allanut tunniunneqarsinnaanngimmata. Taamaattorli akuersissuteqarnissamut piumasagaatit naammassineqarsimatillugit aalajangersimasumik atugaasimavoq pisassiissutit tunniunneqareersimasut tunniuteqqinneqartarneri.

Saarullinniarsinnaanermik ilimagisaqarneq piviusunngorpat saarullinniarneq salliutinneqarsinnaavoq.

Imm. 2 nr 1.-imiit nr. 4-mut

Angallatip angissusaanik pinnaasaanillu pisariaqartitsineq suliniummiit suliniummut allan-ngorassaaq, taamaamallu inatsimmi annertunerusumik erseqqissarneqarsinnaanani. Imm. 2-mi nassuarneqarpoq aningaasartuutit suut angallammut aningaasaliinermi pisinermi aningaasartuutitut isigineqarnersut. Angallatip pisiarinerani nalinganut ilaapput angallammik naammattumik

pisinnaasaqartumik pisinermi aalisarnermilu atortunut pisariaqartunut aningaasartuutit. Teknikkikkut atortut allat sillimaniarnermilu atortut naammattut nalilerneqartut pisinermi nalinganut ilaapput.

Nr. 5-imut

Teknikkikkut aningaasaqarnikkullu siunnersorneqarnermi pisariaqartumi pineqarpoq aningaasartuutit suut suliniutip pineqartup piviusunngortinneqarnerani pisariaqartinneqartut. Teknikkikkut siunnersorneqarneq pisariaqartoq tassaasinnaavoq angallatip ilusilersornera aalisarnermilu atortut. Pisinermi nalinganut aningaasaqarnikkut siunnersorneqarnermut taamaallaat ilaapput pilersaarusiornermut pineqartumut tulluurtumik ilaasut.

Imm. 3-mut

Inuussutissarsiortunik siuarsaanermi tapersiisarneq pillugu peqqussut maannakkut atuuttoq malillugu Qaanaap, Ittoqqortoormiit Ammassallillu kommuuniinut immikkut iluaqutaasunik malittarisassaqqarpoq. Nalunaarusiornikkut tapiissutit annertussusaannik piunasaqaatinillu malittarisassanik annertunerusumik aalajangersaanissaq aalajangersakkami periarfissinneqarpoq. Taassuma saniatigut Qaanaap, Ittoqqortoormiit Ammassallillu kommuuniinut atuuttunik angallatit angissusissaat pissutsillu allat pillugit malittarisassanik aalajangersaasoqarsinnaavoq.

§ 8-mut.

Imm. 1-imut

Pilersaarutit nutaamik pilersitsisut pilersaarutinit allanit annerusumik misissuinissamik siunnersuinissamillu pisariqartitsisuupput. Ajutoortoqariataarsinnaanera annertuneruvoq, taamaattumillu pinngitsoorani nammineq aningaasaliinissamik piunasaqaatitaqanngitsumik, § 9 naapertorlugu, nammineq aningaasaliinertaqanngitsumik 50 %-i angullugu tapiisoqarsinnaanera periarfissaalluni.

Nr. 1-imut

Pilersaarusiornermi aningaasartuutini pineqarput biologinit teknikikkullu aallarniutaasumik misissuinerit.

Nr. 2-mut

Aalisariutaanngitsunut, illunut ikkussukkanullu aalajangersagaanngitsunut pisinissamut tapiissuteqartoqarnissanik qinnuteqaatigineqarsinnaavoq. Taamaalilluni aningaasartuutininut suliniummi periarfissanik misissuinermi pisariaqartunut tapiisoqarsinnaanera pingaartinneqarpoq. Ingerlatsinermut aammalu pilersitsinermit tapiissutiviit aalajangersakkamik ilaan-ngillat. Aalajangersakkami siunertaavoq ammaanqassasoq misissuinerne allaaserineqartuni atortunut pisariaqartunut tapiissutisisinnaaneq, tassungali peqatigitillugu aaqqiissutaagallartunut angallatinut illunut il.il. pilersitsinermit ilaanngitsunut tapiissuteqarnissamut periarfissat killilerneqarlutik.

Nr. 3-mut

Teknikkikkut, aningaasatigut biologinillu siunnersorneqarnissamik pisariaqartitsinermi pineqarput aningaasartuutit suliniutip pineqartup piviusungortinneqarnissaanut tulluurtumik pisariaqartinneqartut. Pisinermi nalinganut siunnersorneqarnermut taamaallaat ilaapput pilersaarusiormut pineqartumut tulluurtumik ilaasut.

§ 9-mut.

Imm. 1-imut

Aalajangersagaq periarfissiivoq §§ 6-imiit 8-mut malillugit nammineq aningaasaliisoqarnissaa piumasaralugu tapiissuteqartoqarsinnaanerani.

Imm. 2-mut

Aalajangersagaq naapertorlugu nammineq aningaasaliissutit aningaasaanngitsut allat atorlugit akiliutigineqarsinnaapput, pilersaarummi aningaasaliissutit atorneqarniarloq imaluunniit pigisat nalillit pilersaarummi aningaasartuutinut tamarmiusunut pissusissamisoortumik pisariaqartutullu ilaappata.

Pigisat nalillit aningaasaliissutigineqartut nalinginik uppersaartit nassiunneqartut tunngavigalugit Naalakkersuisut nalilersuisinnaapput.

Pigisat nalillit aningaasaliissutigineqartut niuernermi atugassaritineqartut nalinginnaasut malillugit annertunerusumik naleqarsinnaanngillat. Pigisat nalillit aningaasaliissutigineqartut nalingi nalornissutaalerpata Naalakkersuisut pigisat nalillit nalilersortissinnaavaat.

§ 10-mut.

Imm. 1-imut

Siunnersuummi kissaatigineqarpoq qulakkeerneqassasoq Naalakkersuisut tapiissutinik aaqquussinerat aningaasannarnernut atorneqannginnissaa, assersuutigalugu tapiissutisinerup kinguinngua angallatip niuerfimmi atugassaritineqartunit appasinnerusumik akilersillugu tunineqarnerani. Aammattaaq piffissami sivisuumi ingerlatsisoqarnissaa piumasaralugu pimoorullugu qinnuteqartoqarnissaa inatsisissatut siunnersuummi qulakkeerneqarpoq. Tamanna pinngitsoorniarlugu angallat imaluunniit suliniutit ukiut qulit ingerlaneranni tunineqarsinnaanngillat.

Qinnuteqartup nalunaarutigissavaa akueralugu angallat suliniutilluunniit tapiiffigineqartut Naalakkersuisut akuersitinnagit tunineqarsinnaanngillat, tapiissutit utertillugit akilerneqarneqaaqaarnerisigulluunniit tunineqarsinnaalluni.

Piffissaq tunniussivissaq pisineq isumaqatigiissusiortarnerlu pillugit inatsisit nalinginnaasut tunngavigalugit aalajangersarneqassaaq.

Imm. 2-mut

Aalajangersagaq periarfissiivoq tapiissutit utertillugit akilerneqaratik piginnittut nikissinnaanerani. Tassani piumasaqaataavoq suliniummi tapiiffigineqarsimasumi piumasaqaatit allanngortinnagit ingerlatiinnarneqarnissaat.

Taamaalilluni suliniut ingerlalluartoq tunisinermi sanngiillisinneqassanngitsoq nalilerneqarpat tunineqarsinnaanera taamaallaat periarfissaavoq. Taamaattumik § 4-mi oqaatigineqartut pilersaarummik allaaserinnineq nutaaq nassiunneqassaaq § 5-ilu naapertorlugu uppersaait nassiunneqassallutik. Aalajangersakkap massuma siunertaa tassaavoq, suliniut inatsisip matuma siunertaanut naapertuuttut nalilerneqarsimasooq, pilersaarutip ingerlaannarnissaa periarfissaqartillugu atorunnaarsinneqassanngitsoq. Tamatum kingunerissagaluarpaani aningaasat pilersaarummi Naalakkersuisunit aningaasaliissutigineqarsimasut annaaneqarsinnaaneri.

Imm. 3-mut

Aalajangersakkap siunertaraa piginnittuulersup nutaap § 10, imm. 2 malillugu tapiissutit akilerneqarneranni piumasaqaatit akuerissagai.

§ 11-mut.

Uppersaait nassiunneqarnissaat pillugu siunnersuummi § 5-imi marlunnik aalajangersagaqareerpoq. § 11-mi aalajangersagaq ilanngunneqarpoq aningaasat siunertaaq naapertorlugu atorneqarsimanerinit Naalakkersuisut nalilersuinnissaanut atugassat tapiiffigineqartup uppersaaitinik nassiussinissaanik peqqussuteqarnissamut Naalakkersuisunut periarfissiisumik. Aalajangersagaq tamakkiisuunngilaq.

Nr. 1-imut

Naalakkersuisut taamaalillutik misissorsinnaavaat aningaasartuutit matussusiinissamut tapiissutissat qinnuteqaatigineqartut atorneqarsimanerisut. Naalakkersuisut aammattaaq tapiissutit pissarsisoq peqqusinnaavaat pisinermi allagartat, bilagit assigisaallu atorlugit uppersaaitinik nassiussinissaanik.

Nr. 2-mut

Aningaasartuutigineqartuunnaanngitsut uppersarneqarnissaat Naalakkersuisut piumasaqaatigisinnaavaat, kisiannili suliniummi isertitat aamma. Tamassuma Naalakkersuisut periarfissippai § 4 malillugu piumasaqaatit aalajangersakkat malinneqarnerinik misissuinnissamut. Aammattaaq suliniutit immikkoortuini aalajangersimasuni niuernikkut periarfissat Naalakkersuisut uppersartissinnaavaat.

Nr. 3-mut

Aalajangersakkap Naalakkersuisut periarfissippai tuniseqqissinnaanissamut piumasaqaatit atuunnerani ukiumoortumik naatsorsuutit nassitsisoqarnissaanik. Inatsisissat siunnersuummi tapiissutit pineqarput, taamaammallu tapiissutit pissarsisut tamarmik ukiumoortumik naatsorsuutit nassitsinissaat

piviusunngornaviarnani. Kisiannili aalajangersakkami erseqqissarneqarpoq tapiissutininik pissarsisut Naalakkersuisut taamatut peqquppatigit tapiissutininik pissarsisut ukiumoortumik naatsorsuutininik nassitsinissamut pisussaaffeqartut.

§ 12-imut.

Naalakkersuisut nr. 1-imiit 4-mut pisuni allaaserineqartuni tapiissutininik utertitsilluni akiliisoqarnissaanik piunasaqarnissamut pisussaaffeqarput. Aalajangersakkami pisut killilersorneqarput, tassani tapiissutininik pissarsisoq piaaraluni pissusilersornikkut iliuuseqarnikkulluunniit imaluunniit mianersuaalliorujussuarluni tapiissuteqarnermi piunasaqaatinik tunngavigineqartunillu avaqqutaarisimappat.

Nr. 1-imut

Aalajangersakkami aalajangersarneqarput tapiissuteqartoqarnissaanik qinnuteqarnermi tapiissutininik tunniussinermi tunngavigineqartuninik tapiissutininik pissarsisoq eqqunngitsumik paasissutissiisimatillugu iliuusissat.

Nr. 2-mut

Aalajangersakkami aalajangersarneqarpoq tapiissutininik pissarsisup uppernarsaatininik annertunerusunik Naalakkersuinik nassitsequneqarsimanera, tapiissutinillu pissarsisup peqqussutillu malinneqannginnerani iliuusissat.

Nr. 3-mut

Aalajangersakkami aalangersarneqarput, tapiissutininik pissarsisoq tapiissutit atorneqarneranni annertuumik sumiginnaasimanerani iliuusissat. Aammattaaq aalajangersakkami aalajangersarneqarput, tapiissutininik pissarsisup suliniummik naammassinninniarnermi suliffeqarfinnik pitsaasumik ingerlatsinermut akerliusumik ingerlatsinera.

Nr. 4-mut

Aalajangersakkami aalajangersarneqarput tapiissutininik pissarsisoq tapiissuteqarnermi atugassaritinneqartut piunasaqaatillu malinnagit tapiissutininik atuisimatillugu iliuusissat.

§ 12-imut atuuppoq pisortanut akiitsunik kinguaattorutininik akiliisitsiniarneq pinngitsoortitsiniarnerlu pillugit Inatsisartut inatsisaat, Aalisarnermut Aningaasaliissutinut Immikkoortitat pillugit Inatsisartut inatsisaat malillugu pisassarilikkanut atorneqassasoq, tassa siunnersuut imarisamigut aalisarnermut, piniarnermut nunalerinermullu tapiissuteqartarnermut Inatsisartut peqqussutaannut naapertuuppoq.

§ 13-imut.

Aalajangersakkami pisut taaneqarput, tassani tapiissutit utertillugit akilerneqarnissaannik piunasaqarnissaq Naalakkersuisut qinersinnaagaat, § 12-ip

akerlianik, tassani tapiissutit utertillugit akilerneqarnissaannik piumasaqarnissamik Naalakkersuisut pisussaaffeqarmata.

§ 13 malillugu utertitsilluni akiliisoqarnissaannik Naalakkersuisut qinersisinnaanerannut tun-ngaviuvoq pissutsit taaneqartut inuussutissarsiornermi pissutsit nalinginnaasut kingunerannik pisinnaaneratt: Akiliisinnaajunnaarneq, tigusinninneq, inuussutissarsiornermi atugassarissat allanngorneri (aalisarsinnaanermut akuersissutit tunniunneqartarneri).

Aallaaviuvoq pinngitsoornani utertitsilluni akiliisoqartariaqanngitsoq.

Nr. 1-imut

Aalajangersakkami aalajangersarneqarpoq tapiissutinik pissarsisoq sumiginnaarujussuarnermi kingunerannik akiliisinnaajunnaanerani iliuusissat. Aalajangersakkami aalajangersarneqarpoq tapiissutinik pissarsisoq piaaraluni pissusilersornikkut iliuuseqannginnikkulluunniit imaluunniit mianersuaalliorujussuarluni tapiissuteqarnermi piumasaqaatinik tunngavineqartunillu sumiginnaanerani iliuusissat.

Nr. 2-mut

Miarnersuaalliorujussuarnermik assigisaannilluunniit tunngaveqarnermik aalajangersagaq imaqaanngilaq, tassa aalajangersakkami aalajangersarneqarmata tunisinerup niuernerinnarmik tunngaveqarnerani iliuusissat. Tassunga atatillugu aalajangersagaq isigineqassaaq, Aalisarnermut Aningaasaliissutitut Immikkoortitanit aningaasat agguanneqartut utertinneqarsinnaanerannik Naalakkersuisut periarfissinneqarnerat.

Tassani tusinermi akia, tunisinermi iluanaarutit aammalu suliniummik suliaqarnermi naleqquttumik aningaasarsiat aallaavineqassapput, taamaalilluni suliniut annikitsuinnarmik sinneqartooruteqarluni tunineqarpat tapiissutit utertillugit akilerneqarnissaannik piumasaqannginnissaq Naalakkersuisut qinersinnaallugu.

Taamaalilluni pinerit tamaasa aalajangersimasumik naliliisarnissaq pineqarpoq.

Nr. 3-mut

Aalajangersakkami aalajangersarneqarpoq piginnittut annertuumik allanngorneranni iliuusissat. Annertuumik oqarnermi selskabimut piginneqataanermut aningaasaliissutit ilai ima annertugisut pineqarput piviusumik naalagaalluni sunniuteqarneq pineqarsinnaalluni.

Piginneqataasut allat aamma ingerlatseqatigiiffiup piginnittumik, piginneqataassummik nutaamik piginnilersimasumik imaluunniit ingerlatseqatigiiffimmi piginneqataassutiminik annertusisimasumik peqataanera eqqarsaatigalugu naliliinermik tamanna tunngaveqarpoq.

Naalakkersuisut nalilersussavaat piginnittut allanngorneri § 13, nr. 2 malillugu suliniutip tunineqarneranut sanilliunneqarsinnaanersoq. Piginnittut allanngorneri piginneqatigiiffimmik ingerlatsinermik piviusorsioortumik tamakkiisumik

pissuteqarsinnaavoq. Kisiannili nalilersorneqassaaq tapiissuteqartoqarnissaanik qinnuteqaat eqqarsaatigalugu pimoorusaanngitsumik piginnittuuneq pineqarnerseq.

Nr. 4-mut

Aalajangersakkami aalajangersarneqarput tapiissutinik pissarsisoq aalisarsinnaanermut akuersissuteqarunnaarluni imaluunniit aalisarnermi suliniummiluunniit pineqartumi pisortaniit akuersissutaateqarunnaarnerani iliuusissat. Aalisarsinnaanermut akuersissutip imaluunniit pisortat akuersissutaasa atorunnaarnerannut pissutaasut aallaavigineqassapput. Aalisarsinnaanermut akuersissut imaluunniit pisortat akuersissutaat pillugu inatsimmik aalisarsinnaanermut akuersissutinut imaluunniit pisortat akuersissutaannut tunngaviummik unioqqutitsinermik aalisarsinnaanermut akuersissummik imaluunniit pisortat akuersissutaannik annaasaqarneq pissuteqarpat, tapiissutit utertillugit akilerneqarnissaat pineqassaaq. Akerlianilli tapiissutinik pissarsisup inuussutissarsiummik allamik tamakkiisumik ilaannakortumilluunniit ingerlataqalernera ilinniagaqarnerluunniit pissutigalugu aalisarsinnaanermut akuersissummi eqqortinneqarsinnaajunnaarpata sakkukinnerusumik naliliisoqassaaq.

§ 13-imut atuuppoq pisortanut akiitsunik kinguaattoorutinik akiliisitsiniarneq pinngitsoortitsiniarnerlu pillugit Inatsisartut inatsisaat, Aalisarnermut Aningaasaliissutinut Immikkoortitat pillugit Inatsisartut inatsisaat malillugu pisassarilikkanut atorneqassasoq, tassa siunnersuut imarisamigut aalisarnermut, piniarnermut nunalerinermullu tapiissuteqartarnermut Inatsisartut peqqussutaannut naapertuuppoq.

§ 14-imut.

Siunnersuummi § 14 Aalisarnermut Aningaasaliissutinut Immikkoortitat pillugit Naalakkersuisut itisilerutaasumik tamanut atuuttunik malittarisassanik aalajangersaasinnaanerlut pisinnaatitsissutaavoq. Malittarisassat taamaattut Namminersornerullutik Oqartussat nalunaarusiornerisigut aalajangersarneqassapput.

Naalakkersuisut annertunerusunik malittarisassanik aalajangersaanissamut pisinnaatinneqarput, tamannalu annertunerusumik eqaannerusumik periuseqarsinnaanermik kissaateqarnermik tunngaveqarpoq. Taamaalilluni aalisarnermik inuussutissarsiornerup ineriartornissaanik kigaallatsinneqarnissaanilluunniit Naalakkersuisut aaqqiinissaamut Naalakkersuisut periarfissinneqassapput.

Nr. 1-mut

Naalakkersuisut annertunerusunik malittarisassanik aalajangersaanissamut pisinnaatinneqarput, tamannalu annertunerusumik eqaannerusumik periuseqarsinnaanermik kissaateqarnermik tunngaveqarpoq. Taamaalilluni aalisarnermik inuussutissarsiornerup iluani ineriartornerup suliniutit suut pingaartinneqarnerunersut malittarisassiunnerisigut, Naalakkersuisut naleqqussaanissaminut periarfissaqalerput.

Aamma aalajangersakkamiippoq suliniutit nutaaliortut suut siuarsarniarneqarnersut annertunerusumik nassuiarneqarnissaannik periarfissiineq. Inuiaqatigiit aningaasaqarniarneranni pissarsiassanut annertunerpaamik tapiissutaasinnaasutut ilimagineqartut Naalakkersuisut tunngavigissavaat.

Nr. 2-mut

Aningaasat killeqarmata nalunnarusiornikkut najoqqutassanik aalajangersaasoqarsinnaavoq nunap immikkoortui sorliit tapiiffigineqarsinnaanersut. Aalajangersakkami ilaatigut ilaapput nunap immikkoortuini ineriartortitsinermi suliniutit allat.

Aammattaaq inuussutissarsiortunik siuarsaanermi tapiisarneq pillugu peqqussut maannakkut atuuttoq malillugu Qaanaap, Ittoqqortoormiut aamma Ammassaliup kommuniinut immikkut iluaqutaasunik malittarisassaqqarpoq. Nalunaarusiornikkut tapiissutit annertussusaannik piumasaqaatinillu malittarisassanik annertunerusumik aalajangersaanissaq aalajangersakkami periarfissinneqqarpoq. Taassuma saniatigut Qaanaap, Ittoqqortoormiut aamma Ammassaliup kommuniinut atuuttunik angallatit angissusissaat pissutsinillu allat pillugit malittarisassanik aalajangersaasoqarsinnaavoq.

Nr. 3-mut

Aningaasat killeqarmata nalunaarusiornikkut najoqqutassanik aalajangersaasoqarsinnaavoq inuussutissarsiutini immikkoortut sorliit tapiiffigineqarsinnaanersut.

Naalakkersuisut kissaatigippassuk kalaallit aalisarnerat sammivimmut aalajangersimasumut ingerlassasoq, aalisarnerup iluani inuussutissarsiutit suut salliutinneqarnissaat pillugu annertunerusumik malittarisassanik aalajangersaanissaq periarfissaavoq. Aalajangersakkamiippoq suliniutit, suliniutit nutarterisut ataaniittut niuernerme imminnut nappassinnaasutut paasinarsippata, taakku qanoq siuarsarneqarnissaat pillugu Naalakkersuisut annertunerusunik malittarisassanik aalajangersaasinnaasut. Naalakkersuisut taamaalillutik aalisakkanik tukertitsiveqarnermi niuerneq tunngavigalugu ingerlatsinissaq periarfissaqalissappat, taakku pillugit malittarisassiornissaq qinersinnaavaat.

Taamaammat aalisarneq annertuumik imaluunniit periarfissaqalersitsisumik ineriartorpat aalisarnermik taassuminnga annertunerusumik killilersuinissaq aalajangersakkap periarfissaqalersissavaa. Siunertaavoq aalisarnerup sapinngisamik aallaqqaataaniit isumagineqarnissaa, taassuma ineriartornera atuineralu eqqarsaatigalugit.

§ 14, imm. 3 malillugu aalajangersaanissamut piginnaatitsissutip atorneqarnerani inuussutissarsiutit tapiiffigineqartut inuiaqatigiit aningaasaqarniarneranni pissarsiassanut annertunerpaanissaat pingaartinneqassaaq.

Nr. 4-mut

Teknikkikkut, aningaasaqarnikkut ilinniartitaanikkullu piumasaqaatit inatsit malillugu tapiiffigineqarnissamut pisariaqartut pillugit Naalakkersuisut

malittarisassanik aalajangersaasinnaapput. Taamaalilluni suliniutip ingerlanneqarnerani teknikkikkut ilinniagaqarnikkullu maannakkut piumasaqaatit suliniummi takuneqarsinnaassapput. Suliniutit piviusunnngortinneqarneranni "sulinermi iliuusissaq pitsaanerpaq" ("best practice") ingerlanniarneqassaaq, tamannalu nalunaarusiornikkut piviusunnngortinniarneqarsinnaalluni.

Aningaasaqarnermut piumasaqaatinut atatillugu ilaatigut nammineq aningaasaliissutissanut, aningaasatigut tunngavigineqartut annertussusaat imaluunniit imminut akilersinnaassutsimik ilimagineqartut pillugit piumasaqaatinik aalajangersaasoqarsinnaavoq.

§ 15-imut.

Imm. 1-imut

Imm. 1-imi aalajangersarneqarpoq Inatsisartut inatsisaanni aalajangersakkat suut pillammik akiliisitsiffiusinnaanersut.

Nr. 1-imut

Aalajangersakkami § 12 innersuussutigineqarpoq, tassani tapiissutit utertillugit akilerneqarnissaanik piumasaqarnissamut Naalakkersuisut pisussaaffeqarmata. § 13-imi aalajangersarneqarput tapiissutinik pissarsisoq piaaraluni pissusilersornikkut iliuuseqannginnikkulluunniit imalluunniit mianersuaalliorujussuarluni tapiissuteqarnermi piumasaqaatinik tunngavigineqartunillu sumiginnaaneranil iliuusissat. Pisuni taakkunani aamma pillammik akiliisitsisoqarsinnaavoq.

Nr. 2-mut

Aalajangersakkami ilaatinneqarpoq § 4-mi pissutsit taaneqartut pillugit qinnuteqartoq salloqittaalluni paasissutissiinera. Salloqittaalluni paasissutissiinermut paasissutissat eqqunngitsut ilaapput. Aammataaq aalajangersakkami ilaapput qinnuteqartoq Inatsisartut inatsisaanni § 4-mi paasissutissiissutissatut piumasaqaatit paasissutissiissutiginnippagit.

Aalajangersakkami aamma ilaapput, eqqunngitsumik tunngaveqarluni tapiissutit akilerneqarpata imaluunniit nalunngikkaluarlugu paasissutissiisoqanngippat, tassani pineqarluni qinnuteqartup eqqunngitsunik imaluunniit amigartunik Naalakkersuisunut paasissutissiisimanagera.

Naalakkersuisut isumaqarpata kukkusunik paasissutissiisoqartoq, paasissutissiissutigineqartut eqqortuunersut Naalakkersuisut misissussavaat.

Nr. 3-mut

§ 11 malillugu uppersaatinik annertunerusunik Naalakkersuisut peqqusinerat malinneqanngippat, pillammik akiliisitsinissaq periarfissaavoq.

Imm.2-miit 4-mut

Imm. 2-miit 4-mut oqaaseq "unioqqutitsineq" annertuninngorlugu nassuiarneqassaaq. Oqaaseq pisunut tamanut taaguutitut atorneqassaaq, tassani

qanoq iliuuseqarnernut sumiginnaasimanernulluunniit aalajangersakkanut
pillaassuteqarfiusinnaasunut naapertuutinngippata. Peqqusinermik malinninnginneq
assersuutigalugu oqaatsimi unioqqutitsinermi ilaavoq.

Kommunimi ataatsimoorussa q kommunalbestyrelsit aamma nunaqarfinni aqutsisut
il.il. pillugit Inatsisartut inatsisaasa ataaniittoq, tassaavoq Kommunalbestyrelsit
aamma nunaqarfinni aqutsisut il.il. pillugit inatsisartut inatsisaanni nr. 20 3.
november 1994-imeersumi kingusinnerusukkut allangortinneqartumi § 64-imi
ilaasut. Aalajangersakkami § 64-i innersuussutigineqanngilaq, tassa ilimagineqarmat
kommunalbestyrelsit aamma nunaqarfinni aqutsisut il.il. pillugit Inatsisartut
inatsisaat aaqqissuussaanermi kommuninillu aaqqissusseqqinnermut atatillugu
allangortinneqassasoq.

§ 16-imut

Siunnersuutigineqarpoq Inatsisartut inatsisaat 1. januar 2007-imi atuutilissasoq.